

每週經課朗誦經文(巴克禮漢羅/教羅)2014/04/27

共同經課 - 1 使徒行傳二章十四 a 節，二十二節～三十二節

14 總是彼得 kap 十一個使徒 khiā-teh，大聲 kā in 講，22 以色列人 ah，tiòh 聽我 ê 話：拿撒勒人耶穌，上帝 bat 用伊 tī lín 中間行各樣 ê 權能、奇事，kap 神蹟，來 tù lín 證明伊，這就是 lín 所知 ê；23 伊照上帝定 tiòh ê 旨意 kap 事先知 ê，已經受解送，lín chiah-ê 借不法 ê 人 ê 手釘十字架害死伊；24 總是上帝 tháu 放 hiah-ê 死 ê 苦痛，hō伊 koh 活；是伊 boē 會 hō死所把縛。25 因為大衛有指伊講，我看主常常 tī 我 ê 面前；伊 tiàm-tī 我 ê chiàⁿ-pêng，hō我免搖動；26 所以我 ê 心歡喜，我 ê 舌快樂；Koh 我 ê 肉體也 beh tiàm-tī òng 望中；27 因為你無 beh 將我 ê 靈魂放下 tī 陰間，也無 beh hō你 ê 聖 ê tú-tiòh 朽爛。28 你 bat 用活命 ê 路指示我；Beh hō我 tī 你 ê 面前滿心快樂。29 兄弟 ah，先祖大衛 ê 事我 thang 好膽對 lín 講，伊已經死 koh 埋葬，伊 ê 墓到今 á 日 iáu tī 咱中間。30 伊既然是先知，koh 知上帝 bat kap 伊 chiù-choā，beh tī 伊後裔中設立一人坐伊 ê 座位。31 伊事先看出 án-ni，就論基督 ê koh 活講，伊無放下 tī 陰間，亦伊 ê 肉體無 tú-tiòh 朽爛。32 Chit-ê 耶穌，上帝已經 hō伊 koh 活，阮 chiah-ê lóng 做伊 ê 干證。

共同經課 - 2 詩篇十六篇

1 大衛金 ê 詩。1) 上帝 ah，求你保護我；因為我 oá 靠你。2 我 ê 靈 ah，你 bat 對耶和華講，你是我 ê 主，你以外，我無福氣。3 論到地上聖 ê 百姓，In 是極其好，是我所深深歡喜 ê。4 用別 ê 神替換耶和華 ê，in ê 憂苦 beh ná 加添；In 獻 tiān-血 ê 祭，我無 beh 獻；我 ê 嘴唇亦 m̄提起 in ê 名。5 耶和華是我 ê 產業，kap 我杯中 ê 份額；我所應得 ê，你 kā 我顧守。6 所量 hō我 ê 地，是 tī 真 súi ê 所在；我 ê 產業實在真好。7 我 beh o-ló hit-ê 教示我 ê 耶和華；暝時我 ê 心腸亦指點我。8 我常常敬奉耶和華 tī 我 ê 面前；因為伊 tī 我 ê chiàⁿ-pêng，我就無搖 choah。9 因為 án-ni 我 ê 心歡喜，我 ê 神快樂；我 ê 肉身亦 beh 安然 khiā 起。10 因為你無將我 ê 靈魂放下 tī 陰間；亦無 hō你 ê 聖 ê tú-tiòh 朽爛。11 你 beh 將活命 ê 路指示我；Tī 你 ê 面前有滿足 ê 歡喜；Tī 你 ê chiàⁿ 手有永遠 ê 快樂。

共同經課 - 3 彼得前書一章三節～九節

3 願咱 ê 主耶穌基督 ê 上帝，也是伊 ê 父，得 tiòh o-ló；伊照伊 ê 大憐憫，用耶穌基督 tù 死人中 koh 活，bat 重再生咱，來得 tiòh 活 ê òng 望，4 也得 tiòh 續接 boē 敗壞，boē lâ-sâm，boē 衰退 ê 業，為 tiòh lín 保守 tī 天裡 ê；5 lín 是 tù 信 hō上帝 ê 權能保護，到得 tiòh 拯救，是便便 tī 末期 beh 顯明 ê。6 因為 án-ni，lín 真快樂，雖然現今，若應該 tiòh，tī 百樣 ê 試煉來暫時憂悶，7 hō lín ê 信 ê 經驗，比 hit-ê bat 過火鍛鍊，也猶原會敗壞 ê 金，iáu-khah 寶貝 ê，tī 耶穌基督顯現 ê 時，得 tiòh o-ló，榮光，尊貴。8 Lín m̄-bat 看見伊，也疼伊；現今無看見 iáu-kú 信伊，就 tù hit-ê 講-boē 出滿滿有榮光 ê 歡喜來快樂；9 得 tiòh lín 信 ê 結局，就是神魂 ê 得救。

共同經課 - 4 約翰福音二十章十九節～三十一節

19 Hit 日就是七日 ê 頭一日，已經暗，學生因為驚猶太人，就 tī in 所 toà ê 所在關門；耶穌到，khiā tī 中間，kā in 講，願 lín 平安。20 已經講 chit-ê 話，就用手 kap hiáp 下 hō in 看。學生看見主，就歡喜。21 耶穌 koh kā in 講，願 lín 平安；我差 lín，親像父有差我。22 已經講 chit-ê 話，就對 in pùn 氣講，Lín 受聖神；23 lín 赦甚麼人 ê 罪，就赦去；留甚麼人 ê 罪，就留 teh。24 有多馬稱做 Té-thó-má ê，是十二學生 ê 一個，耶穌到 ê 時，伊無 saⁿ-kap tī-teh。25 其餘 ê 學生就 kā 伊講，阮 chiah-ê 已經看見主 lah。但是多馬 kā in 講，我若無看見伊手中釘 ê 跡，無用我 ê 指頭 á 探伊釘 ê 跡，無用我 ê 手探伊 ê hiáp 下，我決斷 m̄信。26 過八日，伊 ê 學生 koh 再 tī 厝內，多馬亦 tī-teh。門已經關，耶穌到，khiā tī 中央，講，願 lín 平安。27 就 kā 多馬講，伸你 ê 指頭 á 來看我 ê 手；伸你 ê 手探我 ê hiáp 下；莫得做 m̄信 ê，tiòh 做信 ê。28 多馬應講，我 ê 主 ah，我 ê 上帝 ah。29 耶穌 kā 伊講，你因為看見我 chiah 信；hiah-ê 無看見來信 ê 人，有福氣。30 耶穌 tī 學生 ê 面前，koh 有行 choē-choē 神蹟，無記 tī chit 本冊 ê；31 獨獨記 chiah-ê，hō lín 信耶穌是基督，是上帝 ê Kiáⁿ；信，就 tī 伊 ê 名得 tiòh 活。